

Mga Pagpili alang sa Kahangtoran, Bahin 2



Ikaduha: Hibaloa ang kamatuoran mahitungod sa unsay gitanyag kaninyo sa Dios nga Amahan ug sa Iyang Anak, si Jesukristo.

Sa laktod pa, Sila mitanyag kaninyo sa tanan!

Ang plano sa Langitnong Amahan alang sa Iyang mga anak magtugot kanato nga magpuyo kon asa ug sa unsang paagi Siya nagpuyo ug sa katapusan anam-anam nga mamahimong mas sama Kaniya. Ang Iyang Plano literal nga mohimo sa labing buhong nga mga panalangin sa tanang kahangtoran nga maanaa alang kanato, lakip sa potensiyal alang kanato nga mamahimong “isigkamanunod uban kang Kristo.” [Mga Taga-Roma 8:17].

Ang Dios nasayod sa tanan ug nakakita sa tanan. Sa tanang kahangtoran, wala nay laing mas nakaila kaninyo o nagpakabana mahitungod kaninyo kaysa Kaniya. Wala nay laing mas duol kaninyo kaysa Kaniya. Kamo makapahayag gayod sa inyong mga gibati ngadto Kaniya ug makasalig Kaniya nga mopadala sa Espiritu Santo ug sa mga anghel sa pag-atiman kaninyo. Iyang gipakita ang Iyang kinadak-an nga gugma sa dihang Iyang gipadala ang Iyang Bugtong Anak aron mamatay alang kaninyo—aron mahimong inyong Manluluwas ug inyong Manunubos!

Pinaagi sa Iyang Pag-ula, si Ginoong Jesukristo nakabuntog sa kalibotan [tan-awa sa Juan 16:33; Doktrina ug mga Pakigsaad 50:41]. Busa, Siya “gamhanan sa . . . paglimpyo [kaninyo] gikan sa tanan nga dili matarong” [Alma 7:14]. Siya moluwas kaninyo gikan sa inyong kinalisoran nga mga kahimtang sa Iyang kaugalingon nga paagi ug panahon. Samtang kamo moduol ngadto Kaniya sa hugot nga pagtuo, Siya mogiya, mopreserbar, ug mopanalipod kaninyo. Siya moayo sa inyong masulub-on nga kasingkasing ug mohupay kaninyo sa inyong kaugtas [tan-awa sa Lucas 4:18; Alma 7:10–12]. Siya mohatag kaninyo og pagtugot nga makagamit sa Iyang gahom. Ug Siya mohimo sa imposible sa inyong kinabuhi nga mahimong posible. . . .

Ang Dios adunay espesyal nga gugma alang sa matag tawo nga mohimo og pakigsaad Kaniya diha sa mga tubig sa bunyag. Ug kana nga balaanon nga gugma mapalawman samtang ang dugang pa nga mga pakigsaad gihimo ug matinud-anong gituman. Dayon sa katapusan sa mortal nga kinabuhi, bililhon ang paghiusa sa matag anak sa pakigsaad sa atong Langitnong Amahan [tan-awa sa Salmo 116:15].

Siya nagpakabana *gayod og maayo* nga ang tanan sa Iyang mga anak adunay kahigayonan nga makadungog sa malipayon nga mga balita sa gipahiuli nga ebanghelyo. Ang Langitnong Amahan nagpadala sa Iyang mga anak ngadto sa yuta sa sobra unom ka libo ka tuig. Kadaghanan niini nga mga tawo wala pa makadawat sa mga ordinansa nga mopasarang nila sa kinabuhing dayon. Mao kana ngano nga ang mga templo mahinungdanon kaayo. Mao kana ngano nga ang pagpundok sa Israel sa duha ka habig sa tabil mao *ang* labing importante nga kawsa sa yuta karon. Kamo, akong minahal nga mga kauban niini nga balaan nga buhat, adunay mahinungdanon nga tahas niini nga pagpundok, ug ako nagpasalamat kaninyo alang niini. (Russell M. Nelson, “Mga Pagpili alang sa Kahangtoran” [tibuok kalibotan nga debosyonal alang sa mga young adult, Mayo 15, 2022], [broadcasts.ChurchofJesusChrist.org](https://www.churchofjesuschrist.org/broadcasts))